

友人見訪

世態紛華總不堪
韶光晦跡臥烟嵐
不因知友來相訪
更有何人到此庵

訪友人

綠水青山作近鄰
清風明月可相親
飢餐飯罷無餘事
閒步松巖謁故人

友人以詩覓丹藥索和其韻

休教一物到心間
觸處無情覺性安
牢固自家身內寶
不須他處覓神丹

別友人

茅庵水遠竹籬邊
仙友同居講妙玄
別後何年相會遇
駕雲朝禮祖師前

道藏輯要

西雲集

七

易集七

李先生索賦二首

莫問修行事若何
羣魔戰退罷干戈
天宮咫尺非遙遠
方寸無塵卽大羅

君還欲慕出塵才
念斷人間絕往來
象外家風休遠覓
分明方寸有瑤臺

贈人壽日

不用莊椿壽贈賢
聊將拙語對君傳
殷勤牢固精神氣
自得壺中日月延